



REPUBLIKA E SHQIPËR

KUVENDI

Komisioni ad hoc për Verifikimin e Kandidatëve

PROCESVERBAL

Tiranë, më 23.05.2017, ora 12:00

Drejton mbledhjen:

Ulsi Manja – kryetar i Komisionit

Rendi i ditës:

1. Propozimi nga kryetari i komisionit për programin e punës dhe kalendarin e zhvillimit të seancës dëgjimore publike me kandidatët, si edhe data e përcjelljes së listës komisioneve përzgjedhëse.

Marrin pjesë:

Ulsi Manja, Flamur Noka, Vasilika Hysi, Luan Rama, Oerd Bylykbashi dhe Fatmir Mediu.

HAPET MBLEDHJA

Ulsi Manja - Mirëdita, të gjithëve!

Në zbatim të vendimit të Kuvendit të Shqipërisë nr.72/2017 sot jemi mbledhur për të konstituuar komisionin *ad-hoc* për verifikimin e kandidatëve për institucionet e rivlerësimit sipas ligjit nr.84/2016 “Për rivlerësimin kalimtar të gjyqtarëve dhe të prokurorëve në Republikën e Shqipërisë”. Siç e dini tashmë me vendim të Kuvendit në përbërje të këtij komisioni janë: tre kolegë nga ana e opozitës Oerd Bylykbashi, Flamur Noka, Fatmir Mediu dhe nga maxhoranca unë, në cilësinë e kryetarit të këtij komisioni, kolegja Hysi, që është njëkohësisht edhe kryetare e Komisionit të Ligjeve, si edhe kolegu tjetër i Lëvizjes Socialiste për Integrim, Luan Rama.

Po me vendim të këtij Kuvendi, kryetari i këtij komisioni, e thashë pak më parë kryesohet nga maxhoranca dhe nënkryetar i këtij komisioni sipas vendimit të Kuvendit do të jetë kolegu, Flamur Noka.

Sot në rendin e ditës kemi miratimin e programit të punës dhe kalendarin për zhvillimin e seancave dëgjimore publike me kandidatët që janë bërë pjesë e garës për në panelet e vetingut. Komisioni *ad-hoc* në punën e tij, në zbatim të urdhrat të Kuvendit të datës 22.05.2017 do të asistohet nga sekretariati teknik, i cili do të bëjë mbështetjen e punës së këtij komisioni. Në përbërje të sekretarisë teknike janë caktuar: Jonida Hoxha, Yllka Banushi dhe Gledion Hysolli në cilësinë e këshilltarëve të këtij komisioni për verifikimin e kandidatëve për në institucionet e rivlerësimit të gjyqtarëve dhe të prokurorëve në Republikën e Shqipërisë. Ndërsa Edlira Rama dhe Antonela Veshi do të jenë sekretare të këtij komisioni.

Të nderuar kolegë, në zbatim të aneksit kushtetues dhe të ligjit “Për rivlerësimin kalimtar të gjyqtarëve dhe të prokurorëve në Republikën e Shqipërisë” ky komision që fillon veprimtarinë sot, do të marrë në shqyrtim të gjithë dokumentacionin e 193 kandidatëve, dokumentacion i ardhur nga Avokati i Popullit dhe nga Operacioni Ndërkombëtar i Monitorimit. Dokumentacioni është i disponueshëm për secilin nga anëtarët e komisionit. Ligji dhe Kushtetuta na obligon që t’i zhvillojmë seancat dëgjimore me secilin nga kandidatët, prandaj sot është nevojshme që ky komision të miratojë programin e punës dhe kalendarin e detajuar për zhvillimin e seancave dëgjimore publike. Në përfundim të afatit 10- ditor të përcaktuar nga Kushtetuta dhe ligji “Për rivlerësimin e gjyqtarëve dhe të

prokurorëve në Republikën e Shqipërisë” ky komision do të prodhojë një produkt, një listë përfundimtare, të cilën do t’ia përcjellë Kuvendit të Shqipërisë për t’ua vënë në dispozicion dy komisioneve të tjera *ad-hoc*, të cilat janë konstituar po dje në seancën plenare me vendim të Kuvendit të Shqipërisë.

Ftoj kolegët të japin një mendim lidhur me kalendarin, që gjithsesi është i kushtëzuar nga një afat kushtetues.

Faleminderit!

Flamur Noka – Për sa kohë që Kushtetuta ka përcaktuar afatin limit për punën e komisionit, ne në mbledhjen e parë kemi konstituimin. Jemi dakord me programin e punës. Nuk besoj se kemi më shumë për të diskutuar.

Ulsi Manja - Po, zonja Hysi.

Vasilika Hysi - Faleminderit, zoti kryetar!

Duke qenë se Kushtetuta dhe ligji “Për rivlerësimin e gjyqtarëve dhe të prokurorëve në Republikën e Shqipërisë” na ka përcaktuar një afat të shkurtër dhe numri i kandidatëve që do të intervistohen është i madh. Mendoj të ngarkohen këshilltarët e komisionit, që do të na asistojnë, për të na përgatitur një draft-kalendar, duke parashikuar kohën që ne duhet të kemi në dispozicion për të studiuar një për një dosjet dhe gjithë dokumentacionin e depozituar nga Avokati i Popullit. Pasi të kemi bërë studimin e dosjeve, të dokumentacionit shoqërues, si dhe të opinionit të Avokatit të Popullit e të misionit ndërkombëtar të monitorimit, të fillohet me seancat dëgjimore.

Kjo është gjëja e parë. Së dyti, mendoj se do të ishte e dobishme që, për efekt të transparencës, por edhe për të unifikuar standardet e vlerësimit, sidomos kur duhet marrë një vendim për të kaluar me katër vota, nga lista e personave që nuk janë vlerësuar tek lista e personave të cilët mund t’u paraqiten dy komisioneve të tjera, ose me pesë vota nga lista për të cilën është shprehur një opinion negativ nga misioni ndërkombëtar i monitorimit. Pra, që të kemi të gjithë një vlerësim të njëjtë, nga ana metodike do të ishte e këshillueshme të kemi një formalizim të të gjitha kriterëve që ka Kushtetuta dhe ligji, me qëllim që të përdorim si tregues, si indikator, për të bërë vlerësimin individual, ku secili prej nesh të marrë për të studiuar dosjet e secilit kandidat. Pasi t’i kemi dëgjuar nëpërmjet intervistës, të gjykojmë nëse ka kandidatë të cilët mund të kalojnë me katër apo pesë vota në listën, e cila do t’u dërgohet më pas dy komisioneve.

Ky është një proces i gjatë, kështu që unë do të sugjeroja që të mos humbim kohë, që këshilltarët të fillonin nga puna, nën udhëzimin tuaj dhe të nënkryetarit të komisionit, zotit

Noka, për të bërë të gjitha fotokopjet e dokumentacionit, gjithë pjesën metodike. Të kemi edhe disa modele të vendimmarrjes, sepse për shumë gjëra do të kemi vendimmarrje, e kjo vendimmarrje të jetë edhe e regjistruar, e formalizuar, me qëllim që çdo qytetar, e më pas çdo kandidat, të ketë transparencë jo vetëm në regjistrimin audio, por, në rast të ndonjë ankimi, edhe në dokumentacionin që ne do të prodhojmë.

Faleminderit!

Ulsi Manja – Zoti Mediu.

Fatmir Mediu – Duke shtuar atë që tha zonja Hysi për transparencë të procesit, është e rëndësishme që ne të kemi jo vetëm dosjet e atyre që kanë kandiduar, por edhe gjithë informacionin për përzgjedhjen që ka bërë Avokati i Popullit apo OMN-ja.

Në qoftë se ka informacione konfidenciale, apo informacione që hyjnë tek ato të klasifikuara, të përdorim të gjithë që jep ligji, për ta shqyrtuar këtë në mënyrë më të veçantë, por gjithmonë në transparencë të plotë me kandidatët dhe me opinionin publik. Kjo është e rëndësishme për të proceduar sa më shpejt.

Ulsi Manja – Zoti Bylykbashi.

Oerd Bylykbashi – Faleminderit, kryetar!

Ne jemi një komision i ngritur mbi bazën e një tagri kushtetues, e më pas të përcaktuar nga ligji. Ky është një proces i parë shumë i rëndësishëm, një nga elementët thelbësorë të marrëveshjes që çoi në miratimin e amendamenteve kushtetuese më 22 korrik 2016. Detyra jonë parësore është që, në mënyrë përfundimtare, dy komisioneve të tjera t'u çojmë një listë të konsoliduar dhe përtej çdo dyshimi, të kandidatëve për këto organe të rëndësishme, siç janë komisionet e vetingut, Kolegji i Apelit, e të tjerë.

Ajo që tha zoti Mediu është shumë e rëndësishme: pra transparenca e këtij procesi është thelbësore, në mënyrë që ky proces të jetë përtej çdo dyshimi, e për rrjedhojë, është në tagrin tonë, në detyrën tonë, që të garantojmë jo vetëm skrupolozitet në gjykimin tonë, por edhe transparencë për kandidatët. Për rrjedhojë, të gjithë duhet të dinë në kohë për arsyet pse janë skualifikuar, në mënyrë që të kenë mundësi të bëjnë atë që ne kemi për detyrë, procesin e apelit, dhe ne, përtej çdo dyshimi, t'i çojmë ato. Ky është një element që ju, si kryetar, ne të gjithë së bashku si komision, kemi për detyrë ta sistemojmë gjatë këtyre ditëve, ndaj të merren masa nga ne dhe nga sekretariati, që kjo të realizohet në mënyrën më të plotë të mundshme.

Faleminderit.

Ulsi Manja – Po, zoti Rama.

Luan Rama – Jam dakord me të gjitha konsideratat dhe sugjerimet që bënë kolegët parafolës, dhe ajo që unë dua të theksoj ka të bëjë me faktin që me konstituimin dhe me nisjen nga puna të këtij komisioni vetë reforma në drejtësi hynë në një fazë shumë të rëndësishme të jetësimit të saj, për t'i çelur rrugën në këtë mënyrë formësimit dhe fillimit nga puna të institucioneve të reja të drejtësisë dhe, natyrisht, duke vlerësuar dhe respektuar integritetin e të gjithë kolegëve dhe besimin që ka dhënë Kuvendi.

Nuk ka asnjë arsye të dyshojmë se produkti do të jetë jo vetëm produkt i një vlerësimi rigoroz dhe shumë skrupuloz nga të gjithë anëtarët, por, pa dyshim, për t'i shërbyer qëllimit dhe arsyes se pse e gjithë shoqëria shqiptare është e fokusuar te reforma në drejtësi, me qëllim që institucionet e reja të drejtësisë të krijojnë atë besim që realisht duhet të kenë te drejtësia.

Kështu që, nga kjo pikëpamje, ne do të jemi të angazhuar maksimalisht, pavarësisht faktit që koha prej 10 ditësh është shumë e kufizuar, shumë e limituar, duke pasur parasysh që janë 192 kandidatë, janë 192 dosje që duhen shqyrtuar me dokumente të plota. Besoj se edhe atë që thatë ju, meqenëse po flas i fundit, kam të drejtë ta ritheksoj se angazhimi ynë do të jetë maksimal dhe çdo kandidat do të respektohet në çdo gjë për të bërë vlerësim sa më objektiv dhe të paanshëm.

Flamur Noka – Që t'i japim drejtim sa më shpejt dhe sa më shkurt çështjes, dy janë pikat kryesore:

E para, duhet që në mënyrë sa më të shpejtë të përpilojmë ne kalendarin dhe t'i lëmë stafit teknik modalitetet e tjera teknike për të na e bërë të mundshme dhe më të lehtë punën tonë.

E dyta, duhet detyrimisht të kërkojmë informacionin e detajuar për çdo kandidat, sepse transparenca duhet të jetë baza e punës sonë, siç e thanë edhe kolegët.

Këto të dyja janë pikat kryesore që ne të vazhdojmë dhe të mirëfunksionojë ky komision.

Faleminderit!

Ulsi Manja – Besoj se biem dakord edhe me sugjerimet e koleges Hysi dhe të kolegëve të tjerë për të pasur një kalendar të detajuar të punës së këtij komisioni. Por, paraprakisht, dua t'ju vë në dijeni, se sekretariati teknik po bën gati të gjithë dokumentacionin për të gjithë kandidatët që do të thirren për në seancë dëgjimore në këtë komision dhe që sot do t'ju vihen në dispozicion të gjithë anëtarëve të këtij komisioni për të filluar menjëherë, pa humbur kohë, nga puna.

Në zbatim të ligjit ne si komision sot kemi në dispozicion 3 lista, siç e ka përcaktimi i ligjit, një listë të kandidatëve që plotësojnë kriteret formale, një listë të kandidatëve që nuk i plotësojnë kriteret formale sipas përcaktimeve të ligjit dhe një listë të kandidatëve të rekomanduar nga Operacioni Ndërkombëtar i Monitorimit, të cilat, sigurisht, i keni në dosjet tuaja.

Unë shpresoj që ta përmbyllim me sukses detyrën që na ka ngarkuar ligji dhe Kuvendi i Shqipërisë në kohë dhe në afatin e përcaktuar.

Duke i uruar punë të mbarë këtij komisioni, shpresoj në konstruktivitetin e gjithsecilit nga kolegët, edhe pse koha në dispozicion e secilit prej nesh është shumë e limituar, por është detyrë që duhet ta mbyllim dhe besoj se gjej edhe mirëkuptimin tuaj për t'i qëndruar korrektë atij kalendari që do të bëjmë bashkërisht.

Faleminderit për prezencën!

Ditën e mirë!

MBYLLET MBLEDHJA